

Aktuelnosti:

1. Potpisan protokol o bratimljenju između Općine Stari Grad i Općine Seldžuk
2. Pokrenute aktivnosti na izradi LEAP-a u Općini Cazin
3. Sve bliža izgradnja regionalne deponije za područje USK
4. Potpisan ugovor o sufinansiranju rekonstrukcije glavnog cjevovoda
5. Potpisan ugovor o sufinansiranju opremanja i uređenja Gradske vijećnice
6. Pola miliona KM za Gradačac i Sapnu za projekte zaštite okolice
7. OSCE u BiH pokrenuo projekt „Akademija za građane“
8. Završena isporuka opreme u okviru Projekta GAP
9. Donji Vakuf dobija tržni centar i auto salon
10. Građevinski zamah u Sanskom Mostu
11. Deset općina blizu dogovora o izgradnji zajedničke regionalne deponije
12. Banovići investiraju u lokalni razvoj
13. U pripremi sanacija i izgradnja kanalizacije i vodovodne mreže u B. Petrovcu
14. Admir Hadžiemrić novi načelnik Općine Travnik
15. Nova ulaganja na području općine Cazin
16. Održana javna rasprava o nacrtu Zakona o koncesijama
17. Održana radionica o izradi LEAP-a
18. Općina Cazin vrši emisiju obveznica
19. Zenica planira realizaciju 300

POTPISAN PROTOKOL O BRATIMLJENJU IZMEĐU OPĆINE STARI GRAD SARAJEVO I OPĆINE SELDŽUK



SARAJEVO, 29. avgust/kolovoz – Načelnik Općine Stari Grad Sarajevo Ibrahim Hadžibajrić i načelnik Općine Seldžuk, najstarije Općine u Konyi, Ugur Ibrahim Altay potpisali su protokol o bratimljenju.

Protokol je potpisan 23. avgusta/kolovoza ove godine u Konyi, u Republici Turskoj.

Ovaj sporazum doprinijet će jačanju lokalnih zajednica, njihovom međusobnom povezivanju, kao i povezivanju građana i naroda ove dvije općine.

Saradnja između općina Stari Grad i Seldžuk, između ostalog, bazirat će se na realizaciji projekata od zajedničkog interesa u oblastima privrede, kulture, obrazovanja, turizma, sporta, kao i zaštite prirodnog i kulturnog naslijeđa.

Cilj protokola je promocija svih kulturnih, socijalnih i humanih veza između dva naroda u okviru njihove historijske bliskosti, te jačanje historijskih, kulturnih, informativnih, naučnih, industrijskih, trgovačkih, tehničkih, umjetničkih, zdravstvenih, sportskih i turističkih veza između Općine Stari Grad i Općine Seldžuk.

Općina Stari Grad Sarajevo u posljednjih nekoliko godina potpisala je protokole o saradnji s 13 općina i gradova iz nekoliko zemalja.

Do sada se pobratimila sa općinama i gradovima iz Turske, Slovenije, Makedonije, Albanije, Kosova, Crne Gore, kao i općinama iz BiH. Na ovakav način pokazuje opredjeljenje i spremnost za razvijanje dobrosusjedskih odnosa sa općinama i gradovima, kao i promicanje temeljnih principa suživota i tolerancije.

POKRENUTE AKTIVNOSTI NA IZRADI LEAP-a U OPĆINI CAZIN



MDG ACHIEVEMENT FUND

CAZIN, 26. avgust/kolovoz – Općinski načelnik, Hamdija Ogršević je nakon potpisivanja Memoranduma o razumjevanju, donio Odluku o početku izrade Lokalnog akcionog plana zaštite životne sredine (LEAP).

Riječ je o projektu koji se realizira u okviru MDG-F programa Očuvanje okoliša i

novih projekata u narednih 10 godina

20. Suradnja UNDP-a i Općine Bihać na realizaciji više investicijskih projekata
21. Održana javna rasprava o nacrtu Zakona o matičnim knjigama FBiH
22. Objavljen drugi poziv na Programu IPA Adriatic
23. NAJAVA obilježavanja Dana općina

Poštovani članovi i čitaoci,

Kao i do sada, obavještavamo Vas o unutrašnjoj i vanjskoj komunikaciji i razmjeni najboljih iskustava i praksi kao i o različitim obukama koje mogu doprinijeti kadrovskom jačanju općinskih službenika.

Putem ovog biltena se možete informirati i o drugim dešavanjima u proteklom periodu kao što su konferencije, seminari, okrugli stolovi a koji mogu doprinijeti unapređenju sistema lokalne uprave.

Ukoliko želite da se prijavite za primanje ovog biltena možete to učiniti tako što ćete poslati e-mail na sljedeću adresu: dino@sogfbih.ba

Molimo vas da ovaj elektronski bilten proslijedite svim zainteresiranim u vašoj i susjednim općinama.

Ukoliko želite da objavite neke od vaših novosti, iskoristite elektronski bilten Saveza, koji je brz, efikasan i jeftin način komuniciranja sa javnošću.

Sa zadovoljstvom očekujemo vaše komentare, sugestije i primjedbe.

[Kontaktirajte nas](#)

klimatske promjene: „Standardizacija upravljanja okolišem: povezivanje lokalnih i državnih aktivnosti u BiH“, koji je trogodišnji program koji zajednički provodi pet UN agencija: Razvojni program Ujedinjenih nacija (UNDP), UN Volonteri (UNV), UN program za okoliš (UNEP), UN organizacija za hranu i poljoprivredu (FAO) i UN Organizacija za obrazovanje, nauku i kulturu (UNESCO) u partnerstvu sa Ministarstvom za vanjsku trgovinu i ekonomske odnose BiH, Ministarstvom civilnih poslova BiH, Ministarstvom za prostorno uređenje, građevinarstvo i ekologiju RS, Ministarstvom za prostorno uređenje, građevinarstvo i ekologiju RS, Ministarstvom okoliša i turizma FBiH, Ministarstvom poljoprivrede, vodoprivrede i šumarstva FBiH, općinama, te organizacijama civilnog društva.

Program se finansira sredstvima španskog Fonda za dostizanje milenijumskih razvojnih ciljeva (MDG-F). Trenutno se vode aktivnosti na izradi procjene sadašnjeg stanja, nakon čega predstoji aktivno uključivanje zainteresirane javnosti, obrada prikupljenih podataka, određivanje općih specifičnih ciljeva i izrada konačne verzije LEAP-a, kojeg usvaja Općinsko vijeće Cazin.

SVE BLIŽA REALIZACIJA PROJEKTA IZGRADNJE REGIONALNE DEPONIJE ZA PODRUČJE USK

SANSKI MOST, 26. avgust/kolovoz –

Na poslednjoj sjednici, održanoj prije godišnjih odmora, Općinsko vijeće Sanski Most usvojilo je odluku o prihvatanju sporazuma o zajedničkom upravljanju otpadom na području Unsko-sanskog kantona te pristupanju privrednom društvu "Regionalna deponija USK".

Aktivnosti na ovom planu pokrenula

je i Vlada USK na svojoj jučer održanoj sjednici. Ideja o osnivanju regionalne deponije za Unsko sanski kanton prisutna je već godinama, ali se zbog niza razloga veoma sporo ostvaruje.

Preduzeće "Regionalne deponije USK", kao privredno društvo koje će upravljati otpadom, formirano je još polovinom 2004. godine sporazumom šest općina i Unsko-sanskog kantona. Općine Sanski Most i Bihać nisu tada bile potpisnice navedenog sporazuma zbog neslaganja oko osnivačkih uloga općina u novom preduzeću kao i cijena vezanih za prihvatanje otpada. Također, jedan od krupnih nesporazuma bio je vezan i za lokaciju, budući da niti jedna od općina nije bila voljna da se buduća deponija nalazi na njihovom teritoriju.

U međuvremenu, pristupanjem Općine Bihać ovom projektu, određena je i buduća lokacija regionalne deponije koja bi se trebala nalaziti na lokalitetu brda Grabež – Drenovo Tijesno. Zeleno svjetlo za realizaciju projekta dala je i Općina Sanski Most, prihvatajući da iznos osnivačkih uloga svake od općina bude određen na osnovu broja stanovnika. Obzirom da su uklonjene prepreke daljem razvoju cijelog projekta, stvorene su i pretpostavke za operacionalizaciju međunarodnih sredstava za njegovo finansiranje. Druga faza projekta otpočela je prošle godine i u tu svrhu Svjetska banka izdvojila je 22 miliona dolara kreditnih sredstava pod povoljnim uvjetima.

Ova sredstva su namijenjena izgradnji sanitarnih regionalnih deponija i finaciranju opreme za odvojeno prikupljanje otpada te druge aktivnosti vezane za upravljanje



Telefoni:

033/ 216 502, 033/ 552 812

Fax: 033/552 810, 033/ 552 811

<http://www.sogfbih.ba>

<http://www.partnerstvogradova.ba/>

<http://www.nexpo.nalas.eu>

e-mail: dino@sogfbih.ba

NAŠ CILJ je informirati vas o seminarima, treninzima, konferencijama i drugim aktivnostima, koji unapređuju lokalnu upravu i kadrovsko jačanje zaposlenih u vašim općinama.

KORISNI LINKOVI ZA PREDPRISTUPNE FONDVE:

<http://www.southeast-europe.net/en/>

<http://www.adriaticipacbc.org/>

<http://www.interregadriatico.it/index1.html>

<http://www.europa.ba/>

<http://www.cbib-eu.org/en/welcome/index.html>

<http://www.cbc.bih-mne.org/>

<http://www.srb-bih.org/>

<http://www.cbc-cro-bih.net/>

<http://www.programmed.eu/>

<http://www.tacso.org/>

otpadom. Iako je urađeno mnogo aktivnosti od strateškog značaja za izgradnju regionalne deponije, slijede proceduralne aktivnosti oko izdavanja građevinske dozvole i početka gradnje regionalne deponije, te je Federalnom ministarstvu okoliša i turizma, koje je nadležno za ovo pitanje, upućena molba da ono bude u vrhu prioriteta. Problem gazdovanja otpadom u općinama USK u svim poslijeratnim godinama jedno je od najaktuelnijih pitanja.

Tako je i općina Sanski Most živo zainteresirana za osnivanje regionalne deponije zbog činjenice da su kapaciteti sadašnje lokalne deponije na Sanskim brdima pri kraju, a pomenuta deponija već godinama ima karakter privremene i jedan je od najvećih ekoloških problema općine.

POTPISAN UGOVOR O SUFINANSIRANJU REKONSTRUKCIJE GLAVNOG CJEVOVODA



GRUDE, 26. avgust/kolovoz – Načelnik Gruda Viktor Marić i Boris Maslo, direktor Projekta upravne odgovornosti (Governance Accountability) potpisali su jučer u Grudama Ugovor o sufinansiranju projekta "Rekonstrukcija glavnog transportnog cjevovoda od Vodospreme Grudsko Vrilo do Vodospreme Sovići", koji financiraju Chemonics, Inc. i Švedska agencija za međunarodni razvoj i suradnju, Sida.

Kako je priopćeno iz Općine Grude, vrijednost ugovora iznosi 125.000 KM.

Primarni rezultati koji se očekuju od ovog projekta su: povećanje kapaciteta dotoka vode za preko 3.500 žitelja zapadnog dijela općine Grude, te za gospodarske subjekte na tom području; svođenje na minimum nestašica vode, koje su česte tijekom proljeća i ljeta; omogućavanje kvalitetne opskrbe pitkom vodom i poboljšanje uvjeta života za žitelje mjesnih zajednica Sovići Donji, Sovići Gornji i Gorica; te povećanje prihoda za Javno komunalno poduzeće Grude.

POTPISAN UGOVOR O SUFINANSIRANJU OPREMANJA I UREĐENJA GRADSKJE VIJEĆNICE

MOSTAR, 26. avgust/kolovoz – Gradonačelnik Mostara Ljubo Bešlić i direktor Projekt upravne odgovornosti (GAP) Boris Maslo potpisali su jučer u Gradskoj upravi Mostara Ugovor o sufinansiranju projekta "Opremanje i unutarne uređenje Gradske vijećnice". Tom prigodom istaknuto je kako GAP sufinansira spomenuti projekt sa 125.000 konvertibilnih maraka.

Gradonačelnik Bešlić zahvalio je GAP-u što je podržao projekt istaknuvši kako će ta sredstva znatno ubrzati završetak radova na Gradskoj vijećnici.

"Radovi na Gradskoj vijećnici napreduju, a ova će sredstva omogućiti da se oni završi do konca godine", kazao je gradonačelnik Bešlić.



POLA MILIONA KM ZA GRADAČAC I SAPNU ZA REALIZACIJU PROJEKATA IZ OBLASTI ZAŠTITE OKOLICE

TUZLA, 25. avgust/kolovoz – Načelnici općina Gradačac i Sapna, kao i predstavnici javnih preduzeća kojima su odobrena sredstva za finansiranje projekata iz oblasti zaštite okoliša danas su u prostorijama Ministarstva prostornog uređenja i zaštite okoliša Tuzlanskog kantona potpisali ugovore o dodjeli sredstava. U skladu sa Programom raspodjele namjenskih sredstava Ministarstva prostornog uređenja i zaštite okolice za 2011. godinu kao i odlukama Ministarstva danas su potpisani ugovori u ukupnoj vrijednosti od 514.868,26 KM.

"Svjesni smo da su ova sredstva nedovoljna za kompletnu realizaciju projekata koji su ove godine kandidirani, te se nadamo da ćemo slijedeće godine biti u prilici da u Budžetu Tuzlanskog kantona za ove namjene planiramo značajniji iznos sredstava", istakla je u svom obraćanju ministrica prostornog uređenja i zaštite okolice Senija Bubić, koja je u ime Ministarstva i potpisala današnje ugovore.

Za projekte iz oblasti zaštite okolice Općini Gradačac je odobreno ukupno 245.772,50 KM, i to 123.541,00 KM za II fazu uređenja gradskog parka, 96.631,50 KM za sanaciju, rekultivaciju i modernizaciju pješačke staze "Aleja kestenova u Gradačcu" i 25.600,00 KM za čišćenje putnog pojasa.

Općini Sapna za projekte iz oblasti zaštite okolice, odobreno je ukupno 25.367,76 KM i to: 8.867,76 KM za čišćenje divljih deponija u MZ Kovačevići "Strana" i "Trnjak", 8.200,00 KM za prokres, košenje korova i sakupljanje otpada na regionalnim putevima u općini Sapna, te 8.300,00 KM za prokres, košenje korova i sakupljanje otpada na lokalnim putevima u općini Sapna.

Kada su u pitanju Javna preduzeća Ministarstvo prostornog uređenja i zaštite okolice je javnim preduzećima koja imaju sjedište, obavljaju djelatnost i realiziraju projekte na području Tuzlanskog kantona, a koja su kandidovala projekte iz oblasti zaštite okolice radi dodjele sredstava, odobrilo ukupno 243.728,00 KM.

OSCE U BIH POKRENUO PROJEKT AKADEMIJE ZA GRAĐANE



SARAJEVO, 25. avgust/kolovoz – Misija OSCE-a u Bosni i Hercegovini danas je objavila javni poziv građanima Grada Banje Luke, i

općina: Bijeljina, Cazin, Doboj, Novi Grad Sarajevo, Široki Brijeg i Tešanj, za učešće u projektu *Akademija za građane 2011. godine*, čiji je cilj upoznati građane s upravljanjem i radom općina i gradova.

Misija OSCE-a u BiH, u suradnji s navedenim općinama i gradovima, provodi pilot-projekt *Akademija za građane*, radi razvoja održivog sistema prijenosa znanja o tome kako djeluju lokalne vlasti. Rad projekta *Akademija za građane* odvija se kroz niz diskusija i predavanja s općinskim zaposlenicima, koja će se održavati jednom sedmično, od oktobra/listopada do decembra/prosinca 2011. godine.

"Očekujemo da će ovaj projekt povećati nivo razumijevanja među građanima o strukturi lokalnih vlasti i njihovoj funkciji, te ojačati vezu među građanima i općinama," izjavio je Richard Williams, direktor Odjela za ljudsku dimenziju Misije OSCE-a u BiH.

Predavanja će pružiti više informacija o lokalnim izborima, urbanom razvoju i zaštiti okoliša, javnoj sigurnosti i službama za hitnu pomoć, komunikaciji i učešću u

procesu odlučivanja, razvojnim planovima i njihovoj provedbi kroz budžet, te učešću u sektoru civilnog društva.

Građani, koji su zainteresirani da pohađaju *Akademiju za građane* u jednoj o sedam općina i gradova, mogu preuzeti prijavni obrazac s internet stranica općina ili Misije OSCE-a. Popunjene prijave mogu se predati lično, ili putem pošte, na adrese navedenih općina i gradova.

ZAVRŠENA ISPORUKA OPREME U OKVIRU PROJEKTA GAP

BOSANSKI PETROVAC, 23. avgust/kolovoz –

S ciljem unapređenja kapaciteta lokalne uprave u Bosni i Hercegovini u oblasti pružanja usluga građanima, u općini Bosanski Petrovac uspješno je završena realizacija Projekta upravne odgovornosti faza II (GAP), odnosno isporuka opreme za realizaciju ovog Projekta. Unapređenje usluga građanima, kao cilj ovog projekta prvenstveno se odnosi na implementaciju prioriternih projekata u okviru općinskog akcionog plana (MAP). Projekat je finansiran od strane USAID-a, Sida-e i EKN-a.



Realizacija projekta obuhvata program licenciranja softvera, unapređenje sposobnosti općine za upravljanje informacionim tehnologijama, razvoj elektronske biblioteke, unapređenje unutrašnje komunikacije i srednjoročno planiranje budžeta.

Budžet za implementaciju MAP projekta izrađen je na bazi procijenjenih troškova, baziranih na prosječnim tržišnim cijenama u ukupnom iznosu od 72.000,00 KM.

U toku je i obuka o Višegodišnjem planiranju budžeta čijim završetkom će biti kompletirani i svi programi u okviru Projekta. U toku Projekta GAP izvršena je kompletna informatizacija Općine, nabavljeni računari za sve uposlenike, licencirani softveri, te osposobljen Centar za pružanje usluga građanima i izdavanje dozvola. U drugoj fazi Projekta formirana je i elektronska biblioteka, a znatan dio sredstava GAP-a obezbjeđen je i za Razvoj poslovne zone kroz Projekte kapitalnih investicija.

DONJI VAKUF DOBIJA TRŽNI CENTAR I AUTO SALON



DONJI VAKUF, 19. avgust/kolovoz – Vijećnici Donjeg Vakufa usvojili su na jučerašnjoj sjednici prijedlog rješenja tržnog centra i auto salona koji bi se trebali graditi na lokaciji gdje se već tridesetak godina nalazi nedovršena zgrada doma kulture.

"Izgradnja tržnog centra i auto salona na mjestu gdje je prije rata počela gradnja objekta predviđenog za dom kulture je interes grada a ne

političko pitanje i stoga je veoma značajno da je podržana ideja o realizaciji ovog projekta", rekao je načelnik Huso Sušić.

Podsjetio je na provedenu javnu raspravu i stav građana da je neophodno uraditi bilo šta, samo da se ukloni ruglo koje godinama narušava izgled grada.

O kakvom bi se objektu radilo i koje bi sadržaje ponudio vijećnike je upoznao Sead Rešidbegović, predstavnik HL grupe, koja je izrazila ozbiljne namjere da investira u gradnju tržnog centra i auto salona s pratećim servisom u Donjem Vakufu.

Najveći efekat, naglasio je, od izgradnje ovih objekata, koja bi se okončala u roku od dvije do tri godine, bilo bi upošljavanje 50-70 ljudi, a u fazi pripreme i obavljanja građevinskih i ostalih radova vodilo bi se računa da budu angažirane firme iz Donjeg Vakufa.

GRAĐEVINSKI ZAMAH U SANSKOM MOSTU

SANSKI MOST, 19. avgust/kolovoz –

Općina Sanski Most u ovoj godini pokrenula je niz projekata iz oblasti komunalne infrastrukture, koji imaju za cilj unaprijeđenje kvaliteta života građana i stvaranje uslova za intenzivniji privredni razvoj ove lokalne zajednice.

Općinske vlasti u narednom periodu planiraju proširenje industrijske zone Šejkovača, gdje će se pored poslovnih prostora otvoriti mogućnost izgradnje

stambenog dijela. Na ovom lokalitetu pripremljene su građevinske parcele, te je otvoren konkurs za dodjelu gradskog zemljišta na kojim će biti izgrađene stambeni, poslovni i proizvodnih objekti koji ne zagađuju okolinu.

Putem konkursa potencijalnim investitorima nudi se 15 parcela, čija početna cijena ide od najniže 5,339 KM do najviše od 31.718,40 KM. Površine parcele kreću se od 300 do 2,140 metara kvadratnih.

Na javni oglas mogu se prijaviti sva pravna i fizička lica koja do isteka konkursa polože depozit u iznosu od deset posto od početne prodajne cijene parcele na koju su konkurirali, a prvenstvo kod odabira imaju oni ponuđači koji ponude najveću cijenu.

Podsjećamo, Šejkovača je prije nekoliko godina od deponije za stare automobile pretvorena u industrijsku zonu, gdje je pružena mogućnost izgradnje brojnih poslovnih i proizvodnih objekata.

Također, nova poslovno-stambena zgrada trebala bi niknuti na mjestu stare željezničke stanice, koja će se nakon izrade regulacionog plana najvjerovatnije dati na prodaju putem javnog poziva.

Jedan od najvažnijih projekata ove godine jeste i nastavak izgradnje kanalizacione mreže Mahala.

Vrijednost radova iznosi 155.000KM, a projekt se sufinansira sredstvima švicarske Agencije za razvoj i saradnju, uz podršku organizacije Una consulting iz Bihaća, koja uspješno provodi slične projekte iz oblasti voda i zaštite okoliša.

U postupku izbora izvođača nalazi se i projekat rekonstrukcije gradskog mosta preko rijeke Sane te radova na rekonstrukciji prilaznih saobraćajnica.

Idejnim projektom predviđeno je proširenje postojeće nosive konstrukcije mosta, čime bi se dobile dvije šire kolovozne trake kao i trotoarske površine. Također, predviđena je izgradnja balkona kao i prilagođavanje postojećih saobraćajnica, a posebna atrakcija bila bi vodena zavjesa koja bi se prostirala cijelom dužinom mosta.



DESET OPĆINA BLIZU DOGOVORA O IZGRADNJI ZAJEDNIČKE REGIONALNE DEPONIJE

BOSANSKI ŠAMAC, 18. avgust/kolovoz – Načelnici 10 općina iz Federacije BiH i Republike Srpske održali su jučer u B. Šamcu sastanak o odvozu i deponovanju smeća, na kojem je konstatovano da ovaj problem može biti riješen izgradnjom zajedničke regionalne deponije.

Podršku dogovorima načelnika općina Šamac, Vukosavlje, Odžak, Gradačac, Srebrenik, Modriča, Gračanica, Donji

Žabar, Pelagićevo, Derventa i Doboj pružio je i OSCE sa sjedištem u Tuzli.

"Ovo je pozitivna inicijativa koju ćemo podržati, jer naša uloga je da pokušamo da omogućimo komunikaciju određenih donatora i izvora finansiranja sa općinama koje su zainteresovane za ovakve aktivnosti", rekao je Stefano Elaro, službenik za javnu upravu i učešće građana u OSCE-u.

Načelnik Općine Šamac Savo Minić, koji je predsjedavao sastankom, istakao je da su načelnici danas dobili odgovarajuće informacije od predstavnika OSCE-a o tome kod kojih fondova ove lokalne zajednice mogu aplicirati za projekte, a da one u međuvremenu obezbijede parametre na osnovu kojih bi bila izrađena privremena studija izvodljivosti.

Fadil Imširović, načelnik Općine Gradačac, rekao je da je ovo iskorak i prilika da evropskoj i široj zajednici bude ponuđen pozitivan pogled na rješavanje lokalnih problema.

Današnji sastanak predstavlja nastavak prethodnog dogovora održanog u Gradačcu. Naredni sastanak zakazan je za septembar/rujan u općini Odžak.



BANOVIĆI INVESTIRAJU U LOKALNI RAZVOJ

BANOVIĆI, 16. avgust/kolovoz – Nedostatak krupnih investicija mnoge općine pokušavaju nadoknaditi vlastitim finansiranjem rekonstrukcije ili izgradnje lokalnih komunalnih i objekata društvenog standarda. Primjer tome je Općina Banovići, u kojoj se ovog ljeta realizira nekoliko značajnih projekata. Značajni su po tome jer angažiraju mala građevinska preduzeća, koja time postaju otpornija na negativne efekte krize.

Jedan od njih je poboljšanje vodosnabdijevanja u mjesnim zajednicama koje su imale otežan dotok vode. Tako su investicijom od više od 200.000 KM, koje je obezbijedila Općina, a podržala i Federacija BiH, u MZ Brezovača i Treštenica dovedene nove količine vode. Ovih dana obezbijeđene su sve dozvole i priključena električna energija na objekte, čime su zvanično završene sve procedure te je novi vodovod pušten u rad.

Značajno komunalno gradilište je i sanacija svih kapitalnih objekata, filter-stanica i tirolskih zahvata te izgradnja i montaža novog potisnog cjevovoda i rezervoara od 100 metara kubnih u MZ Banovići Selo. U konačnici, ovo će obezbijediti dodatne količine vode, poboljšati kvalitet vodosnabdijevanja i smanjiti gubitke u vodovodu. Pored ovog projekta, u toku su završni radovi na izgradnji mjesnog voda u Pribitkovićima.

Novo gradilište otvoreno je i u MZ Oskova, gdje počinje izgradnja novog arminiranog betonskog mosta na rijeci Oskova. Radi se o mostu dužine 12 metara, koji je spajao naselje Oskova i MZ Omazici s regionalnim putem Banovići – Živinice, koji je nedavno urušen uslijed djelimične dotrajalosti i zloupotrebe prevoznika. U izgradnju ovog mosta Općina će uložiti oko 100.000 KM, čime se će olakšati život za oko 70 domaćinstava.



Također, realizacijom ovog projekta za sedam kilometara će se skratiti put do središta grada i olakšati obavljanje svakodnevnih životnih potreba.

Počela je i rekonstrukcija Općinskog suda čija je investicija vrijedna 35.000KM, a novac su zajednički obezbijedili Općina i kantonalno Ministarstvo pravosuđa. Banovićani očekuju i konačnu odluku Općine o tome ko će na osnovu već raspisanog javnog konkursa dobiti pravo da na dijelu neizgrađenog građevinskog zemljišta kod sportske dvorane gradi poslovne objekte.

Veliki investicijski zahvat u Banovićima desit će se početkom realizacije projekta izgradnje termoelektrane i cementare, u sklopu ovdašnjeg Rudnika mrkog uglja.

U PRIPREMI SANACIJA I IZGRADNJA KANALIZACIONE I VODOVODNE MREŽE U BOSANSKOM PETROVCU



BOSANSKI PETROVAC, 16. avgust/kolovoz

– Tim za upravljanje Projektom sanacije i izgradnje kanalizacione mreže održao je radni sastanak u svrhu analize dokumenta i zahtjeva od predstavnika Evropske investicione banke i tima koji na federalnom nivou koordinira aktivnosti.

Trenutno je u fazi usaglašavanja tenderske dokumentacije i ubrzo se očekuje raspisivanje međunarodnih tendera za

nabavku opreme i materijala i izvođenje radova. Prema Projektu, radi se o sanaciji centralnog i izgradnji istočnog dijela kanalizacione mreže u dužini 38 km, za što su već obezbjeđena sredstva u iznosu 5 miliona KM.

2,5 milona KM su sredstva iz kredita Evropske Investicione Banke a 2,5 miliona bespovratni grant iz IPA sredstava, realiziranih preko Vlade FBiH.

Ukoliko aktivnosti oko raspisivanja i provođenja tendera budu tekle po planu, očekuje se početak radova na izgradnji kanalizacije u proljeće 2012. godine.

Općina Bosanski Petrovac je nastavila i sa drugim infrastrukturnim projektima. Realizirana je izgradnja vodovoda do Poslovne zone Gorinčani. Načelnik općine Ermin Hajder potpisao je Ugovor o izgradnji dva otcjepna voda, čime će se vodom snabdjeti i naselje Bare u blizini Poslovne zone.

Pored toga potpisan je i Ugovor o izgradnji kanalizacionog sistema zapadnog dijela grada, pored Partizanskog groblja, za korisnike koji nisu bili obuhvaćeni prvom fazom Projekta.

U OPĆINI TRAVNIK U IZBORNOJ UTRCI ZA NAČELNIKA POBIJEDIO KANDIDAT ADMIR HADŽIEMRIĆ



SARAJEVO, 16. avgust/kolovoz – Centralna izborna komisija BiH donijela je Odluku o utvrđivanju i objavljivanju rezultata prijevremenih izbora za načelnika Općine Travnik održanih 7. avgusta/kolovoza ove godine.

Nakon objedinjavanja rezultata glasanja sa redovnih biračkih mjesta, rezultata glasanja birača izvan BiH, rezultata glasanja birača na biračkim mjestima za glasanje u odsustvu i birača koji glasaju na nepotvrđenim glasačkim listićima utvrđeno je da je u Općini Travnik u izbornoj utrci za načelnika pobijedio kandidat Admir Hadžiemrić iz Stranke demokratske akcije.

Odluka i Izveštaj o rezultatima prijevremenih izbora dostupni su na web-stranici CIK-a www.izbori.ba

NOVA ULAGANJA NA PODRUČJU CAZINA

CAZIN, 13. avgust/kolovoz – Potpisivanjem dva nova ugovora o izvođenju radova ozvaničen je početak novih projekata i novih ulaganja na području općine Cazin. Naime, potpisan je ugovor o izvođenju građevinskih radova na rekonstrukciji, sanaciji i dogradnji objekta Dom kulture-I faza, čija je ukupna vrijednost 137.786,71 KM, zatim ugovor za izvođenje dijela građevinskih radova na stadionu FK "Krajina", a riječ je o projektu uređenja tribina i postavljanju 2.000 sjedalica, čija je ukupna vrijednost 43.000,00 KM.



ODRŽANA JAVNA RASPRAVA O NACRTU ZAKONA O KONCESIJAMA FBIH

SARAJEVO, 08. avgust/kolovoz – Općine kao jedinice lokalne samouprave u određenim situacijama trebalo bi da budu davaoci koncesija i to posebno u slučajevima gdje je općina vlasnik prostora i ukoliko su koncesije male vrijednosti i malog značaja.

Stav je ovo Općine Stari Grad Sarajevo o nacrtu Zakona o koncesijama FBiH. Na javnoj raspravi o ovom nacrtu zakona, koja je održana 29. jula/srpnja, 2011. godine, predstavnici Općine Stari Grad Sarajevo iznijeli su primjedbe o nacrtu Zakona o koncesijama FBiH.

Analizirajući nacrt zakona raspravljano je da li je u cjelosti usaglašen sa direktivama EU u odnosu na javne nabavke, a koje se isprepliću sa koncesijama u propisima i u praksi. Jedna te ista materija je regulirana u 14 zakona što izaziva i probleme i nedoumice jer su različito regulirani uvjeti pod kojima se mogu dodjeliti koncesije, nadležnosti za dodjelu koncesija, institucionalna struktura i druga pitanja vezane za koncesije.

"Imajući u vidu vrlo obiman broj koncesija nabrojanih u Nacrtu zakona o koncesijama (27 vrsta koncesija) među kojima su i one s vrlo malim značajem, kao i vrijednostima koncesija, smatramo da bi jedan broj ovih koncesija trebalo da pripadne u nadležnost jedinicama lokalne samouprave", konstatovao je Mehmedalija Huremović, savjetnik načelnika Općine Stari Grad.

ODRŽANA RADIONICA O IZRADI LOKALNOG EKOLOŠKOG AKCIONOG PLANA



BIHAĆ, 08. avgust/kolovoz – U Bihaću je danas održana druga po redu radionica o izradi Lokalnog ekološkog akcionog plana (LEAP). Ovim je potvrđeno opredjeljenje Općine Bihać u pogledu postizanja milenijskih ciljeva u oblasti očuvanja životne okoline. Lokalnim ekološkim akcionim planom definiran je jedan od najvažnijih ciljeva i vizije Općine Bihać u pogledu budućnosti

okoliša i to njegova zaštita i održavanje, ali i sistem aktivnosti uz pomoć kojih se nastoji postići realizacija LEAP-a.

Sve aktivnosti radionice organizirane su i finansirane od strane MDG-Fa u sklopu programa Očuvanje okoliša i klimatske promjene u postizanju milenijskih ciljeva, a u okviru projekta "Standardizacija upravljanja okolišem: povezivanje lokalnih i državnih aktivnosti u BiH".

Današnji skup u kojem su učestvovali predstavnici Općine, resornih kantonalnih ministarstava, privrednih subjekata, građani i predstavnici civilnog sektora i javnog mnijenja dato je više odgovora, ali i opcija u pogledu izbora vizije i ciljeva kojima Općina Bihać u budućnosti namjerava zaštititi okoliš kao društveni benefit. Tokom radionice, najvažnije mjesto i pažnja u diskusiji i razmjeni mišljenja prisutnih data je upravo definiranju problema, njihovoj prezentaciji, a zatim i strateškim i operativnim ciljevima u osam najvažnijih različitih oblasti.

Kroz diskusije i sugestije učesnika prezentirani su problemi, dopunjeni i unaprijeđeni ciljevi, te je definirana vizija Općine Bihać u kontekstu LEAP-a.

Radna grupa nakon današnjeg skupa, nastaviti će sa završnom fazom izrade LEAP-a, a to je definiranje konkretnih mjera i projekata za rješavanje utvrđenih problema.

Završetak izrade dokumenta LEAP-a se očekuje krajem septembra/rujna 2011. godine, a već u oktobru/listopadu Općina Bihać će imati priliku da aplicira na

natječaj UNDP-a za dodjelu sredstava za projekte definirane LEAP-om. Prema riječima Zlatana Čizmića, koordinatora LEAP-a Općine Bihać, identifikacija problema, određivanje ciljeva i vizije jeste složen i zahtjevan proces, ali to je i najracionalniji put kojim će Općina Bihać doći do dugoročnih i sistemskih mehanizama zaštite životne okoline, a što će biti dobra osnova za dalji razvoj.

OPĆINA CAZIN VRŠI EMISIJU OBVEZNICA

CAZIN, 06. avgust/kolovoz – Koristeći potencijale u razvoju malog i srednjeg preduzetništva Općinsko vijeće Cazina donijelo je odluku o gradnji Poslovne zone na bivšem aerodromu "Ćoralići".

Projekat će se realizovati plasmanom općinskih obveznica putem kojih će prikupiti milion KM, koje će biti uložene u gradnju.

Cazin je, inače, druga općina u Federaciji BiH, koja vrši emisiju obaveznica s namjenom razvoja poslovnih zona.

Izmirenje obaveza po osnovu općinskih obveznica Općina Cazin je vezala za ratni dug Federacije BiH prema Općini koji iznosi 1,1 miliona KM, na koje bi u drugim okolnostima čekala još dvanaest godina.

Rok otplate općinskih obaveznica je usklađen sa rokom dospeljeća sredstava koja će Cazin naplatiti po osnovu ratnog duga od FBiH.

Realizacijom ovog projekta trebao bi biti riješen i problem bivšeg aerodroma Ćoralići, koji je izgrađen 1992. godine.

ZENICA PLANIRA REALIZACIJU 300 NOVIH PROJEKATA U NAREDNIH 10 GODINA



ZENICA, 04. avgust/kolovoz – Općinsko vijeće Zenica usvojilo je Strategiju razvoja općine za narednih 10 godina, koja sadrži oko 300 razvojnih projekata u privredi, društvenom razvoju i ekologiji.

Nacrt Strategije je plod jednoipogodišnjeg rada 200 stručnjaka i predstavnika nevladinog sektora. Dokument predviđa razvoj Zenice u narednih deset godina kojim bi Zenica trebala postati gradom ugodnog življenja, gradom snažne privrede i poslovnih mogućnosti, sporta i zdravog okoliša.

Među ciljevima strategije je i dostizanje omjera od najmanje 40 malih i srednjih preduzeća na 1.000 stanovnika do 2020. godine, privlačenje investicija kojima će se otvoriti najmanje 6.000 radnih mjesta, kao i osiguranje podrške za stvaranje najmanje 200 ekonomski održivih poljoprivrednih domaćinstava u ruralnim

područjima do 2017. godine.

Cilj je u zaštiti okoliša zaokružiti sistem prikupljanja i prerade otpada do 2017. godine, stepen zagađenja vode, zraka i tla dovesti na nivo zakonom definiranog standarda do 2018., te poboljšati stepen energetske efikasnosti za 30 posto do 2020. godine.

Dokument je urađen u saradnji sa UNDP-om. Nakon provedene rasprave usvojen je u nacrtu i upućen u javnu raspravu koja će trajati 60 dana.

SURADNJA UNDP-a I OPĆINE BIHAĆ NA REALIZACIJI VIŠE INVESTICIJSKIH PROJEKATA



BIHAĆ, 04. avgust/kolovoz – Općina Bihać i UNDP izgradili su zdravo partnerstvo na više uspješno realiziranih projekata, a posebno na projektima iz MDG-F Fonda u sprovođenju milenijskih ciljeva u kulturi i drugim oblastima društvenog života, kao što je vodosnabdijevanje građana pitkom vodom.

Novi partnerski ugovori koji će biti realizirani u predstojećem vremenu su nabavka opreme

potrebne za opravku i redovno održavanje vodovodne mreže kojom upravlja JP "Vodovod" d.o.o. Bihać. Vrijednost projekta je 36.000 KM.

Drugi projekat je realizacija prioriternog infrastrukturnog projekta u naselju Lohovo za kvalitetnije vodosnabdijevanje. Vrijednost projekta je 100.000 KM, od čega 50 hiljada KM daje UNDP, a 50 hiljada KM Općina Bihać.

Planirana je i sanacija zgrade Kulturnog centra u Bihaću, bivšeg Doma armije, s namjerom značajnije energetske iskoristivosti, uštede energije i zaštite okoline.

U tom pogledu potrebno je poboljšanje energetskog sistema i grijanja, zamjena stolarije, sanacija krovne konstrukcije i mokrog čvora, fasada, postavljanje solarnih kolektora za zagrijavanje vode isl.

Vrijednost projekta je 450.000 KM od čega UNDP daje 250 hiljada KM, Općina Bihać 100 hiljada KM i Vlada USK 100 hiljada KM.

ODRŽANA JAVNA RASPRAVA O NACRTU ZAKONA O MATIČNIM KNJIGAMA FBiH

SARAJEVO, 22. juli/srpanj – Ministarstvo unutrašnjih poslova Federacije BiH i oba doma Parlamenta FBiH organizovali su danas u Sarajevu javnu raspravu o Nacrtu zakona o matičnim knjigama FBiH.

Trenutno je na snazi zakon, koji je donesen 1992. godine, sa izmjenom koja se desila 1994. godine.

Delegat u Domu naroda Parlamenta FBiH i predsjednik Odbora za pravdu, opću upravu i lokalnu samoupravu u Domu Almedin Aliefendić pojasnio je da se novi zakon usklađuje sa evropskim normama i standardima koje se, između ostalog, odnose na mogućnosti dobijanja izvoda iz matične knjige rođenih u mjestu prebivališta i produženje važenja ovog dokumenta na više od šest mjeseci.

"Usvajanjem zakona o matičnim knjigama FBiH, svi građani će rodni list moći vaditi u mjestu prebivališta, a ne kao dosad u mjestu rođenja. Ovaj dokument biće trajnog karaktera i moći će služiti građanima za sve njihove potrebe", istakao je

Aliefendić.

Savjetnik na projektu Slaviša Šućur kazao je da je jedan od osnovnih razloga za donošenje novog zakona da se postojeće baze podataka u općinama na neki način "legaliziraju".

"Već su urađeni i nacrti podzakonskih akata, koji detaljnije uređuju pitanje načina vođenja formata podataka u elektronskim bazama", kazao je Šućur i dodao da su sve općine, putem IDDEEA-e, uvezane s MUP-ovima što, prema njegovim riječima, znači da je svaki matični ured već uvezan.

"Samo će biti potrebno ostvariti komunikaciju putem te mreže i građani će moći izvaditi izvod na bilo kojem mjestu", pojasnio je Šućur.

Dodao je da je u FBiH predviđeno i uspostavljanje matičnog registra, odnosno registra građanskih stanja, čime bi se postiglo da svi podaci o jednoj osobi budu vođeni na jednom mjestu, odnosno u općini gdje su upisani u matičnoj knjizi rođenih, što je razlika u odnosu na rješenje u Republici Srpskoj.

Zakon je već prošao parlamentarnu proceduru u formi nacрта i prema zaključcima oba doma Parlamenta FBiH, zaduženi su predlađač, Vlada FBiH i komisije da provedu javnu raspravu u predviđenom roku od 60 dana.

Tekst Nacrta zakona o matičnim knjigama FBiH dostupan je na web-stranici FMUP-a (www.fmup.gov.ba) pod linkom zakoni.

Očekuje se da će nakon sumiranja današnje javne rasprave, predlađač zakona, Vlada FBiH, veoma brzo proslijediti zakon u parlamentarnu proceduru.

IPA ADRIATIC OBJAVIO DRUGI POZIV ZA PODNOŠENJE PROJEKTNIH PRIJEDLOGA



16. avgust/kolovoz – Upravljačko tijelo IPA Programa jadranske prekogranične saradnje ADRIATIC objavilo je da je Drugi poziv za podnošenje projektnih prijedloga otvoren od 3. avgusta/kolovoza do 2. novembra/studenog 2011. godine.

Ukupan iznos raspoloživih EU sredstava za Drugi poziv iznosi 69.684.615 eura. Kako se ističe, prijavitelji projekata obavezni su sufinansirati projekat svojim vlastitim sredstvima, dok sufinansiranje projekata od strane IPA fonda iznosi maksimalno 85%.

Prijavljeni projekti moraju pripadati jednom od sljedećih prioriteta programa:

- Ekonomska, socijalna i institucionalna saradnja;
- Prirodni i kulturni resursi i prevencija rizika i
- Dostupnost i mreže.

U ovom Programu mogu sudjelovati države članice EU (Grčka, Italija i Slovenija), Hrvatska i Crna Gora kao zemlje kandidatkinje, te potencijalni kandidati (BiH, Albanija i Srbija).

Na poziv mogu aplicirati subjekti javnog i privatnog sektora, a aplicirati se može kao vodeći partner ili kao partner.

U svakom slučaju projekti moraju uključivati veći broj subjekata iz prihvatljivih zemalja i regija u tim zemljama.

Općine iz BiH koje su prihvatljive za apliciranje su: Bileća, Čapljina, Čitluk, Gacko, Grude, Jablanica, Konjic, Kupres, Livno, Ljubinje, Ljubuški, Mostar, Neum,

Nevesinje, Posušje, Prozor/Rama, Ravno, Široki Brijeg, Stolac, Berkovići, Tomislavgrad, Trebinje, Mostar.

Inače, Program ADRIATIC namijenjen je odabranim lokalnim i regionalnim tijelima pozvanima da odigraju ključnu ulogu s obzirom na njihovu izravnu uključenost u problematiku specifičnu za jadransko područje: jedinicama lokalne i regionalne samouprave, državnim tijelima, istraživačkim institucijama te neprofitnim organizacijama koje žele raditi na prekograničnom projektu s najmanje jednim prekograničnim partnerom.

Poziv u BiH je objavljen u saradnji sa Direkcijom za evropske integracije Vijeća ministara BiH, u funkciji državnog tijela za IPA Jadranski program prekogranične saradnje u Bosni i Hercegovini.

NAJAVA OBILJEŽAVANJA DANA OPĆINA ZA MJESEC SEPTEMBAR/RUJAN

- **08. septembar/rujan - Dan Općine Ravno** i blagdan Male Gospe, zaštitnice župe.
- **08. septembar/rujan - Dan Općine Prozor-Rama** i blagdan Male Gospe.
- **10. septembar/rujan - Dan Općine Banovići.** Na ovaj dan 1995. godine oslobođena je cjelokupna teritorija općine Banovići.
- **14. septembar/rujan - Dan Općine Donji Vakuf.** Tog dana 1995. godine oslobođen je Donji Vakuf.
- **15. septembar/rujan - Dan Općine Zavidovići.** Ovaj datum proglašen je za Dan Općine Zavidovići zato što je u periodu od 10. do 15. septembra 1995. godine izvršeno oslobađanje cjelokupne teritorije Općine Zavidovići (područja Vozuća 10. septembra 1995. godine i Blizna 15. septembra 1995. godine).
- **15. septembar/rujan - Dan Općine Ključ.** Taj dan se obilježava i kao Dan oslobođenja jer su na taj dan 1995. godine jedinice Armije BiH oslobodile Ključ.
- **17. septembar/rujan - Dan Općine Bosanska Krupa.** Navedeni datum predstavlja dan konačnog oslobođenja Bosanske Krupe 1995. godine.
- **18. septembar/rujan - Dan Općine Lukavac.** Značaj ovog datuma je u činjenici da je 1995. godine oslobođena cijela teritorija Općine Lukavac.
- **18. septembar/rujan - Dan Općine Goražde.** Ovaj datum podsjeća na 18.10.1992. godine, kada su jedinice Armije BiH prvi put oslobodile Goražde od neposrednog okruženja neprijatelja, i zlatnim je slovima upisan u historiju Goražda. Ovaj dan se obilježava i kao Dan BPK-a Goražde.
- **18. septembar/rujan - Dan Općine Maglaj.** Toga dana 1408. godine u Povelji ugarskog Kralja Sigismunda „Sub Castro Nostro Maglay“ – „Pod našom tvrđavom Maglaj“ prvi put se u pisanim tragovima spominje ime grada Maglaja.
- **18. septembar/rujan - Dan Općine Kupres.**
- **27. septembar/rujan - Dan Općine Pale-Prača.** Tog dan 1992. godine oslobođena je Hrenovica, najveća mjesna zajednica na prostoru Općine Pale-Prača i oformljeni prvi upravni organi Općine. Taj dan se obilježava i kao Dan otpora za Općinu Pale-Prača.
- **28. septembar/rujan - Dan Općine Livno.** Najstariji pisani dokument u kojem se spominje Livno je Povelja kneza Mutimira od 28.09.892. godine kojom se





Crkva sv. Jurja daruje splitskom nadbiskupu Petru II, u kojoj se među potpisnicima u listi svjedoka na drugom mjestu nalazi i livanjski župan Želimir. Ovaj datum se danas obilježava kao Dan Općine Livno.
